

KORINHTUQ

Pê Chyáng Htang Dàm Hun Kat é Laiká (2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhông é gumang Timohti le kut, Korinhtuq myuq mâ é, Garai Gasang é noqkuq hpúng lé le, Ahkaia mau gón mâ é sâ-n-yúng bang banshoq chyáng le, dang kyô kat lâ:

² Nga-nhông é Îwa nghut é Garai Gasang eq haû Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq.

Nhik títg hkyô banshoq é Garai Gasang

³ Nga-nhông é Yhumsing Yesuq Hkrisduq é Yhângwa eq Garai Gasang, shogyo nhikmyin hkyo é Îwa eq nhik títg hkyô banshoq é Garai Gasang gi, hkya-on kungton é huí nyí sháng gaq.

⁴ Garai Gasang chyáng mai ngamoq wó yû bê nghut é nhik títg hkyo èq, hkasû é wuîhke hkyô hui bang lé le nga-nhông wó nhik títg byi sháng gaq ga, Yhang gi, ngamoq é wuîhke hkyô banshoq má nhik títg byí ri.

⁵ Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq đông mai, ngamoq é nhik títg hkyô le byíng mui nyi é nghut lâ.

⁶ Ngamoq, myit myo uhkyî é huî é nghut jáng, nungmoq é nhik títng hkyô eq hkyi yù hkyo é matú nghut nyi ri; ngamoq, nhik títng é huî é nghut jáng, nungmoq é nhik títng hkyo é matú nghut luî, haû gi, ngamoq jamjaû é eq rajung za nghut é jamjau hkyô lé, myit hing é dông mai wó jân pyâm râ a-tsam, nungmoq chyáng lhoq htoq byî é nghut lhê.

⁷ Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik títng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wui ê, Asia mau má, wuîhke jamjaû é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lháng htum shoq hpuzô é nghut luî, ngamoq gi, asak dui lo râ lháng a myit myoqbyu lô é nghut lhê.

⁹ Gè gè yhang, ngamoq gi, sat hui berâ nghû, ngamoq é i-myit má lumjítng pyâm é nghut lhê. Nghut kôlhang, haû gi, ngamoq gùng ngamoq a lumhkau é za, shî bê bang lé lhoq dui toq sù Garai Gasang lé lumhkaû râ matú dut é nghut lhê.

¹⁰ Garai Gasang gi, haû sù é shî râ hkyô mai hkyi yù bê nghut mù, ngamoq lé hkyi yù râ za nghut lhê. Yhang gi, ngamoq é matú nungmoq kyûdung byî nyi é u má, xoq luî ngamoq lé hkyi yù râ za nghut lhê nghû, ngamoq gi, Yhang lé myit myoqbyu to bê nghut luî,

¹¹ myo myo kyûdung byî é lé gyo byî é má ngamoq shimân jeju wó mù, byù myo myo gi, ngamoq wó é shimân jejû é yanmai Garai Gasang lé

jeju hkya-on kó râ nghut lhê.

Poluq, Hen Tô É Muzó Htaî Pyâm É Lé Taî Hung É Hkyô

¹² Ngamoq nghutbûn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duì bê hkyô lé le, je luî nungmoq eq zùm yap é hkyô lé le, ngamoq é myit sôn sê é hkyo èq, saksé hkám byî é hkyô nghut lhê. Ngamoq haû su kut é gi, mingkan hpaqchyî byéng-yá dông mai kut é a nghut é za, Garai Gasâng é jeju dông mai kut é ru nghut lhê.

¹³ Hkâsu mù gâ le, ngamoq gi, nungmoq a dat nghap é eq a sé gyô é haî le a ká byî kat é nghut lhê. Ngò, myit myoqbyu kat é gi,

¹⁴ nungmoq gi, ngamoq é hkyô ra-am lé wó sê gyô yù bê eq rajung za, haû Yhumsîng Yesuq é buinyì má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sé gyo kó râ nghut lhê.

¹⁵ Haú hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi, nungmoq chyáng hí lé kum râ matú hen to bê nghut lhê.

¹⁶ Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taû lò luî, Yuda mau shut e é hkyowuì má, nungmoq, ngo lé garúm kat kó râ lé myit lum to bê nghut lhê.

¹⁷ Ngò gi, haú hkyô hen é hkûn, agon za hen hkyut é nghut lhê lú? Haû a nghut jáng, ngò hen é pé gi, ra-u má za, "Nghut lhê, nghut lhê." nghû

é eq, "A nghut, a nghut." nghu é wó taí râ matú, mingkan myit đông hen é nghut lê l hú?

18 Gè gè yhang, Garai Gasang gi, lhumzui sũ yhang nghut é eq rajung za, ngamoq é danglù gi, nungmoq chyáng "Nghut lê" lé, "A nghut" nghu é a nghut.

19 Hkâsu mù gâ le, ngo èq le, Sila èq le, Timohti èq le, nungmoq chyáng hko kyo bê nghut é sũ, Garai Gasâng é Yhangzo Yesuq Hkrisduq gi, "Nghut lê" nghu é eq "A nghut" nghu é sũ a nghut é za, Yhang má gi, hkâ-nhám le "Nghut lê" nghu é za joq lê.

20 Hkâsu mù gâ le, Garai Gasang gi, danggidiq hkâ-myhó to kôle, haú pé gi, Hkrisduq má "Nghut lê" chyat nghut lê. Haú mù, Garai Gasâng é hpungwup shingkâng é matú, Yhâng đông mai, nga-nhung gi, "Amen" nghu taí é nghut lê.

21 Ngamoq eq nungmoq lé Hkrisduq má yap gingting nhang é sũ gi, Garai Gasang nghut ri. Yhang gi, nga-nhung lé masat é xũ but byi mù,

22 Yhang sing lê gâ é dizik, nga-nhung lé htung tap byi lui, jé lô râ hkyô pé hkyak joq lê nghu é masat zè đông, Yhâng é Woi-nyí lé nga-nhung é i-myit unghkau má kat byi bê nghut ri.

23 Ngò gi, nungmoq hkyamsa râ matú, Korinhtuq myuq má a dum taú lé é hkyô têng é lé, ngá é saksé dut râ đông Garai Gasang lé wut dũng lê.

24 Haú gi, nungmoq é lumjینگ hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chom zui saí é ru nghut lê; haú mù gâ le, lumjینگ myit mai za nungmoq wó yap gینگ nyí bùm kô é ru nghut lê.

2

¹ Haû mù luí, ngò gi, nungmoq lé myit nò nhâng é dut râ đông, lé dum kûm é a kut râ nghû, myit hpyit to bê nghut lê.

² Hkâsu mù gâ le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luí, ó yuq wá ngo lé wó gabú nhâng râ lû?

³ Ngò jé lé é hkûn, ngo lé gabú nhâng râ âng é bâng eq, ngo lé myit nò nhang é a hui sháng gaq nghû, ngò gi, ngò kut é eq rajung za laiká kê kat bê nghut lê. Ngá é gabú hkyô lé nungmoq banshoq bang wó bo gabú kó râ nghut lê nghû, nungmoq banshoq bang lé ngò hkyak myit lum tô lê.

⁴ Hkâsu mù gâ le, ngò gi, nungmoq lé laiká kê é hkûn, myit myo uhkyí mó eq le, myit má yón kuq é eq le, ngaubyi ngau-nhap é eq le, kê kat bê nghut lê. Haû gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lê.

Mara Hkyut Byî Lhum Râ Hkyô

⁵ Yón kuq hkyô lhoq htoq é sủ gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haû hkyô eq séng luí, ngò gyai wá yhang zuq zuq a taí nau é nghut lê.

⁶ Nungmoq myo hpyâng eq yhang lé mara dam byî é hkyô gi, yhâng é matú gé bê nghut ri.

⁷ Nghut kôlhang, ahkuí, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik títng byi keq.

⁸ Haû mù luî, nungmoq é chyitdap myit gi, yhang é ahtoq má dum lhoq gîng shit nyí keq nghû, nungmoq lé ngò wum taî tsuq kat lê.

⁹ Ngò, nungmoq lé haî mù laiká ká byî kat é hkyô gi, nungmoq chyam wú huî é hkyô lé wó jân é hkyô eq jung hkanmó má jîno gyo hkyô bò a bo é lé, wó sé râ matú le nghut lê.

¹⁰ Nungmoq, rayuq yuq lé mara hkyut byî é nghut le gi, ngò le, haú yuq lé mara hkyut byî lê. Mara hkyut râ rajung jung joq é nghut jáng, ngò mara hkyut é gi, Tsadán eq nga-nhúng lé a wó ûng râ matú, nungmoq é yanmai, Hkrisduq é myoq hí má ngò mara hkyut byi bê nghut lê.

¹¹ Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹² Ngò gi, Hkrisduq é gabú danglù hko kyo râ matú, Troa myuq má ê jé é hkûn, haû Yhumsîng gi, ngo lé hkum hpóng byî é lé, ngò myang ri.

¹³ Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luî, Makedoni mau shut xoq e ló é nghut lê.

¹⁴ Nghut kôlhang, Hkrisduq má, ngamoq lé hkâ-nhám le ûng budang hkyô shut shuí-û yù mù, Hkrisduq lé sê é sumsé hpaqchyí é nam ngón shôm lé, ngamoq dông mai jowò hkanmó má taî pyo é sù, Garai Gasang gi, jeju hkya-ôn é huî nyi sháng gaq.

¹⁵ Hkâsu mù gâ le, ngamoq gi, hkyi yu é huî nyi bâng chyáng le, htên byoq ló é huî nyi bâng

chyang le, Garai Gasang é matú Hkrisduq é nam ngón shôm nghut nyi lê.

¹⁶ Ngamoq gi, htên byoq nyi bang é matú shî-nò hkyo é shôm dut mù, hkyi yù huí nyi bang é matú nghut jáng, asak hkyo é nam ngón shôm dut é nghut lê. Haù mù, ó yuq wá muzó shî eq htuk râ lú?

¹⁷ Ngamoq gi, amyat wó râ matú Garai Gasang é mungdang lé hkat ung zô é byù myo myo su a nghut é za, Garai Gasang chyang mai nhang é byu pé su, Garai Gasang é hí má, Hkrisduq é byu pé đông lhumzui myit mai tai é nghut lê.

3

¹ Ngamoq gi, yhumsing gùng yhumsing dum owaq hi ló é nghut lê lú? Byù ra-am kut é su, nungmoq chyang, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq?

² Nungmoq gùng yhang gi, ngamoq é myit nhiklhum má kâ tô é, yuq hkangmó eq nghap luí sê yu é laiká gùng pé nghut akô.

³ Nungmoq gi, nungmoq chyang ngamoq hpungmù wùn waq é yanmai, Hkrisduq chyang mâ é laiká nghut kô é hkyô lé shit nyi akô. Haù gi, kâ jung chí eq kâ tô é đông a nghut é za, rû dui nyi é Garai Gasang é Woi-nyí eq kâ tô é nghut é htoq agó, luqlong pé má kâ tô é đông a nghut é za, xângzo byu é myit nhiklhum long pé má kâ tô é ru nghut lê.

⁴ Haù su nghû hkyak wó myit lum é hkyô gi, Garai Gasang é hí má, Hkrisduq đông mai ngamoq wó yu é nghut lê.

⁵ Ngamoq gi, yhumsing gùng haî lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê.

⁶ Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dâm byi lhê, Woi-nyí kúm gi, asak byí é nghut lhê.

Dangshikaq Asik É Hpungwup Shingkang

⁷ Ahkuî, haû Mosheq é myoqdong mâ é hpungwup shingkâng é yanmai, haû Israelaq byu pé gi, yhâng é myoqdong lé a wó wú tsuq to kó nghut ri. Hpungwup shingkang haû shûm lo byuq sê é nghut kôlhang, luqlong má dok kê tô é, shî-nò hkyô lhoq htoq é tarâ muzó gi, hpungwup shingkang eq rahá jé lé é nghut lhê.

⁸ Haû su nghut jáng, haû Woi-nyí é muzó gi, hpungwup shingkang je riyhang dut râ a nghut kó lhú?

⁹ Gè gè yhang, haû byù lé mara byî é tarâ muzó lháng, hpungwup shingkang bo é nghut le gi, dingmán nhang é hkyô sik gi, je riyhang hpungwup shingkang bo é nghut lhê ô!

¹⁰ Hkâsu mù gâ le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri.

¹¹ Shum byuq ló é tarâ lháng gi, hpungwup shingkang eq rahá lé jé bê nghut le gi, ru gîng nyí é dangshikaq asik é hpungwup shingkang gi, je riyhang gyaú râ nghut lhê ô!

¹² Haû mù luî, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lhê.

¹³ Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israelaq byu pé haú lé a wú tsuq râ matú, yhâng é myoq-dong lé myoqgo èq nghop pyâm é sù nghut ri.

¹⁴ Nghut kôlhang, yhangmoq é myit gi, lhoq chut byî é hui bekô nghut ri; hkâsu mù gà le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byî ashî nghut ri. Haû gi, huî sêng pyâm é a hui shi, haî mù gà le, Hkrisduq dông za haú lé wó yu pyâm é nghut lhê.

¹⁵ Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklhum má myoqgò èq nghop tô é nghut ri.

¹⁶ Nghut kôlhang, ó yuq le, Yhumsîng chyáng hká u lhîng lò kôlhang, haú hkûn jáng, myoqgò gi, hí pyám byî é hui râ nghut lhê.

¹⁷ Yhumsîng gi, haú Woi-nyí nghut mù, Yhumsîng é Woi-nyí nyi é jowò má, luthkyô le joq lhê.

¹⁸ Haû Yhumsîng é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi hkyô nghut é, Yhâng é isâm shut htaî lhik wang é huî nyi bê nghut lhê. Haú hkyô gi, haú Woi-nyí nghut sù Yhumsîng chyáng mai lo é nghut lhê.

4

Tseyam Pé Má Bo É Sutzè

¹ Ngamoq gi, Garai Gasâng jeju mai muzó hkyô haû wó é nghut mù, myit wum a gyuê é nghut lhê.

² Ngamoq gi, zaú tô é eq hoq htoq é hkyô pé lé tô pyâm luí, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haû su kut râ malaí, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkgámó é myit sôn sê é hkyô má, yhumsing gùng yhumsîng htuk shoq nyi lhê.

³ Ngamoq é gabú danglù gi, myoqgo èq nghop pyâm é huí é nghut jáng, haû gi, htên byoq nyi bâng chyáng za nghop pyâm huí é ru nghut lhê.

⁴ Haû Garai Gasâng é azòng isâm nghut sù, Hkrisduq é hpungwup shingkang bo é gabú danglu é maubó lé, a lumjîng bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri.

⁵ Haû nghut é yanmai, ngamoq gi, yhumsing gùng eq séng luí hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê!

⁶ Hkâsu mù gâ le, "Mauchut hkaû mai maubó htoq lô sháng gaq."✠ ga taí é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkâng é maubó lé sê gyô é nyan lé, nga-nhúng lé byí é dông, Yhâng é maubó lé, nga-nhúng é i-myit unghkaû má duqbó nhâng bê nghut ri.

⁷ Nghut kôlhang, ngamoq gi, sutzè haû bo é

* **4:4** Ipyat shi é garai gâ é gi, Tsadán lé gâ é nghut lhê. ✠ **4:6** Apûn 1:3

tseyam pé† nghut nyi lhê. Haû gi, gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô lé tún shit rá matú nghut lhê.

⁸ Ngamoq gi, wuîhke hkyo èq lhînghkyuq mai gyai yhang nhê zik é hui kôlhang, a gyop byuq é nghut lhê; myit lhoq nhûng pyâm é hui kôlhang, myit a htûm byuq é nghut lhê;

⁹ zing-rî é hui kôlhang, kâng pyám huî é a nghut; bat lhêng pyâm é hui kôlhang, htên byoq huî é a nghut.

¹⁰ Haû Yesuq é asak duì hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shî é hkyô lé, hkâ-nhám le, ngamoq é gungdu má wùn waq wún é nghut lhê.

¹¹ Hkâsu mù gâ le, Yesuq é asak duì hkyô gi, nga-nhûng é shî sê é gungdu má lhoq htoq shit é hui sháng gaq nghû, asak dui nyi é bang ngamoq gi, Yesuq é matû é yanmai, hkâ-nhám le, shi byuq hkyô shut ap pyâm é huî nyi ri.

¹² Haû mù luî, shi byuq hkyô gi, ngamoq má mù zuî nyi ri; asak duì hkyô kúm gi, nungmoq má mù zuî nyi é nghut ri.

¹³ "Ngò gi, lumjîng bê nghut lhê, haû mù, ngò taî é nghut lhê."✧ ga kê tô é eq rajung za, ngamoq le, lumjîng hkyô hau èq yhang, lumjîng bê nghut mù taî é nghut lhê.

¹⁴ Haî mù gâ le, haû Yhumsîng Yesuq lé shi é mai lhoq dui toq é Sû gi, ngamoq lé le, Yesuq eq rahá lhoq dui toq mù, nungmoq eq rahá, ngamoq

† 4:7 Tseyam pé gâ é gi, nga-nhûng é wum nyhôm é gungdu lé gâ é nghut lhê. ✧ 4:13 Hkya-on 116:10

lé Yhâng é hí má shuî jé râ nghut é lé, ngamoq sê lhê.

¹⁵ Haû jeju wó é byu pé gi, je riyhang myô jat lò mù, Garai Gasâng é hpungwup shingkâng é matú, jeju hkya-ôn é hkyô gi, byíng mui nyi sháng gaq ga, haú pé banshoq gi, nungmoq é akyu é matú nghut nyi ri.

¹⁶ Haû mù luî, ngamoq gi, myit wum a gyuî é nghut lhê. Ngamoq é shinggan gungdu gi, htên byoq ló nyi kôlhang, i-myit unghkaû gi, ra-nyí eq ra-nyí asik dut nhang é huî nyi ri.

¹⁷ Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haú pê htoq gyai hkik é ahtum abyuq é hpungwup shingkan lé, wó yû nhang ri.

¹⁸ Haû mù, nga-nhûng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhkûng Htoq Mâ É Yhûm

¹ Haû myidàm zúm nghut é nga-nhûng lúng nyi é gungdu gi, htên byoq sê é nghut kôlhang, byu loq èq saî é a nghut é za, mauhkûng htoq má joq é ahtum abyuq é yhûm* nghut é, Garai Gasâng chyáng mâ é yhûm lé, nga-nhûng wó é hkyô lé, nga-nhûng sê lhê.

* **5:1** *Mauhkûng htoq má joq é ahtum abyuq é yhûm gâ é gi, nga-nhûng, mauhkûng mingdán má jé é hkûn wó râ gungdu asik lé gâ é nghut lhê.*

² Nghut kôlhang, ahkuî, nga-nhúng gi, nga-nhông é mauhkông yhôm lé tû hut byî é lé gyai yhang hui naû mù, nò-kying su kyîng nyi lê.

³ Haî mù gâ le, nga-nhúng gi, hut byî é hui jáng, gungdu a bò bang a dut lo râ nghut lê.

⁴ Hkâsu mù gâ le, nga-nhúng gi, zúm shî má lúng nyi é u lé, wòlai wùn mù, nò-kying su kyîng nyi lê; haû gi, shî byuq sê é lé, asak dui é eq wó htaî lhik pyám sháng gaq nghû, nga-nhúng gi, a hut byî é hui râ lé a ô nau é za, nga-nhông é mauhkông yhôm lé tû hut byî é hui râ lé ô nau é yanmai nghut lê.

⁵ Ahkuî kúm, jeju haû hkam yù râ matú, nga-nhúng lé lajâng to byî é sù gi, Garai Gasang nghut mù, jé lô râ hkyô gi, hkyak joq lê nghû é masat zè đông, nga-nhúng lé haû Woi-nyí byi bê nghut ri.

⁶ Haû mù luí, ngamoq gi, hkâ-nhám le hkyak lum tô lê. Gungdu shî má yhôm đông ru lúng nyi nyi gi, haû Yhumsîng eq wê gâng nyi ashî nghut é lé ngamoq sê nyi lê.

⁷ Ngamoq gi, byu-myang é đông mai a nghut é za, lumjîng myit mai asak dui é ru nghut lê.

⁸ Ngamoq gi, hkyak myit lum tô lê nghû, ngò taî lê, haû mù, gungdu shî mai wê gang luí, haû Yhumsîng eq rahá nyi râ lé ngamoq je riyhang ô nau é nghut lê.

⁹ Haû mù, ngamoq gi, gungdu shî má yhôm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng râ matú nghut lê.

¹⁰ Hkâsu mù gâ le, yuq hkangmó gi, gungdu shî má yhôm đông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú,

Hkrisduq é tarâ jéyáng tanghkuq hí má, nga-nhúng banshoq bang htoq shit ra râ nghut lhê.

Nguingón Hkyô Xoq É Muzó

¹¹ Haû mù, Yhumsîng lé gyuq hkungga râ hkyô haî nghut é lé ngamoq sê é nghut luî, ngamoq gi, byu pé lé taí pûn kyîng shikut lhê. Ngamoq haî nghut é gi, Garai Gasâng chyáng san za nghut nyí mù, nungmoq é myit sôn sê é hkyô má le san za nghut râ lé, ngò myit lum lhê.

¹² Haû myit nhiklhum má bo é lé gumrông râ malaî, byu-myang é lé gumrong é bang lé, nungmoq wó tû taí kó sháng gaq nghû, ngamoq gi, nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byî é ru nghut lhê.

¹³ Ngamoq a gyîng é dông nghut le gi, Garai Gasâng é matú a gyîng é nghut lhê; ngamoq gyîng é dông nghut le gi, nungmoq é matú gyîng é nghut lhê.

¹⁴ Hkâsu mù gâ le, Hkrisduq é chyitdap myit èq ngamoq lé kut nhang nyi é nghut lhê. Haû gi, banshoq bâng é matú rayuq shî hkám byi bê nghut mù, banshoq bang shi é dông nghut bê nghû, ngamoq hkyak sê gyô é yanmai nghut lhê.

¹⁵ Yhang gi, asak dui nyi é bang, yhangmoq yhumsing gung é matú a dui lô é za, yhangmoq é matú shî hkám byi luî, lhoq dui toq é huí Su é matú dui kó sháng gaq ga, banshoq bâng é matú shî hkám byi bê nghut ri.

¹⁶ Haû mù, ngamoq gi, ahkuî mai, ó yuq eq séng luî le, mingkan hkyam dông mai a wú lô é nghut

lhê. Ngamoq gi, hí hkûn Hkrisduq lé haú dông wú é nghut kôlhang, haú su hkâ-nhám le a kut lô é nghut lhê.

¹⁷ Haú nghut mù luí, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haú axau gi, byuq byuq mù, lhunglhang asik dut bu-nhung!

¹⁸ Haú pé banshoq gi, Garai Gasâng chyáng má é chyat nghut lhê. Yhang gi, Hkrisduq dông mai nga-nhúng lé Yhânggùng eq nguingón hkyô xoq yú luí, nguingón hkyô xoq é muzó ngamoq lé byi bê nghut ri.

¹⁹ Haú gi, Garai Gasang gi, byu pé é mara lé a matsing byi é za, Hkrisduq dông mingkan lé Yhânggùng eq nguingón hkyô xoq yú bê nghut luí, Yhang gi, nguingón hkyô xoq yu é mungdang haú lé, ngamoq lé ap byi to bê nghu nau é nghut lhê.

²⁰ Haú mù luí, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pûn kyîng nyi é nghut lhê. Garai Gasang eq nguingón hkyô xoq yú keq nghu, ngamoq gi, Hkrisduq é gunglik dông nungmoq lé dúng tôngbán nyi lhê.

²¹ Nga-nhúng gi, Hkrisduq dông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sù lé, nga-nhúng é matú yubak mara hkungga dut nhâng bê nghut ri.

6

¹ Ngamoq gi, Garai Gasâng é mô zui byinzùm wù nghut nyi é eq rajung za, Garai Gasâng jeju lé

akyû a bo é dông hkâhap yù kó nghû, nungmoq lé wum taî tsuq kat lhê.

² Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yù hui râ buinyì má, nang lé ngò garúm bê nghut lhê."☆

ga luî, Yhang taî ri. Ngò, nungmoq lé taî kyo kôlé, ahkuî gi, Garai Gasang ô nau é ahkyíng, ahkuî gi, hkyi yu é buinyì nghut ri.

Poluq É Wuîhke Hkyô Pé

³ Ngamoq é hpungmû gi, taî hpoî pyâm é a hui sháng gaq nghû, ngamoq gi, ó yuq é hkyô má le, leqbat jung a to byî é nghut lhê.

⁴ Haû kut râ malaî, ngamoq gi, Garai Gasâng é dui-nhâng zoshâng wuî nghut é hkyô lé, hkyô hkanmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuîhke hkyô pé má le, myit myo uhkyí hkyô pé má le shit nyi lhê.

⁵ Nhuq bat huî é pé má le, htóng lhúng huî é eq toq gabyông é má htim é huî é má le, mù zui shikut é má le, a myang yhup é myín pé má le, zòmut huî é má le, shit nyi lhê.

⁶ Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chyitdap myit akying má le,

⁷ tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é laknak pé dông le, shit nyi lhê.

⁸ Hpungwup shingkang byî é hui kô é dông eq a hkunggâ é hui kô é dông nghut kôle, a ge é

☆ 6:2 Esai 49:8

luhkyang eq ge é luhkyang tái kôle, shit nyi lâ. Ngamoq gi, tengmán kôlhang, mhaú zo bang đông sôn yu akô nghut ri.

⁹ Ngamoq lé sé kôlhang, a sê é đông kut akô nghut ri; shi ló nyi kôlhang, rû dui nyi é bang nghut lâ; nhuq bat é hui kôlhang, sat pyâm é a hui shi é bang nghut lâ.

¹⁰ Yón hkyô byíng nhâng kôlhang, hkâ-nhám le gabú nyi lâ; myùng kôlhang, byù myo myo lé wó sùt nhang nyi lâ; haí le a wó kôlhang, jung hkgámó lé sing é đông nghut lâ.

¹¹ Korinhtuq bang ê, ngamoq gi, nungmoq lé san za tái bê nghut luí, ngamoq é myit nhiklhum lé, nungmoq é matú làm shoq hpông to byi bê nghut lâ.

¹² Ngamoq gi, ngamoq é chytđap myit lé, nungmoq chyáng mai lêng taú yu nyi é a nghut, nungmoq sheq, ngamoq chyáng mai lêng taú yu nyi kô é ru nghut lâ.

¹³ Nungmoq le, myit nhiklhum lé làm shoq dum taú hpóng keq nghú, ngò gi, ngá zô pé lé đông tái lâ.

A Lumjíng Bang Eq A Nhunghcut Râ Hkyô

¹⁴ A lumjíng bang eq rahá kandang hkâwaq kó. Hkâsu mù gâ le, đingmán é hkyô eq agè ashóp é hkyô gi, haí sêng lhum lâ lú? Maubó eq mauchut gi, hkâsu wó zùm yap kó râ lú?

¹⁵ Hkrisđuq eq Beliala* gi, hkâsu kut myit wó huí lhum kó râ lú? Lumjíng sù rayuq eq a lumjíng sù gi, hkâsu wó pung lhum kó râ lú?

* **6:15** *Beliala* gâ é gi, Tsadán é myìng rajà nghut lâ.

16 Garai Gasâng é noqkuq yhûm eq hparà lhô pé gi, hkâsu wó hûm râ l hú? Hkâsu mù gâ le, nga-nhúng gi, rû dui nyi é Garai Gasâng é noqkuq yhûm nghut lhê. Haû gi, "Ngò gi, yhangmoq eq rahá nyi mù, yhangmoq chyáng sô nyi râ nghut luî, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê."✧ ga Garai Gasang taî tô é eq rajung za nghut ri.

17 "Haû mù luî, yhangmoq chyáng mai htoq lô mù, gotû san za nyi keq. A sansêng é zè lé hkâzáng kó, haú hkûn, Ngò, nungmoq lé lhom hap yù râ nghut lhê."✧

ga haû Yhumsîng taî ri.

18 "Ngò gi, nungmoq é Îwa dut mù, nungmoq gi, Ngá é byizo yuqzô pé dut kó râ nghut lhê."✧ ga haû wum-o a-tsam dik shoq bò Sû Yhumsîng taî ri.

7

1 Chyitdap é luzúm wuì ê, nga-nhúng gi, dang-gidiq haú pé lé wó tô é bang nghut é yanmai, gungdu eq woi-nyí lé agot a-û dut nhang é jung hkangmó mai, yhumsîng gùng yhumsîng lhoq sân-yúng yû luî, Garai Gasang lé gyuq hkunggâ é myit èq chyoiyúng hkyô má lhoq gumjup yu nyi sháng.

Poluq É Gabú Hkyô

2 Nungmoq é i-myt unghkaû má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaú zô wú é nghut lhê.

✧ 6:16 Nhong 26:12; Yer 32:38; Ezk 37:27 ✧ 6:17 Esai 52:11; Ezk 20:34,41 ✧ 6:18 2 Sam 7:14

³ Ngò gi, nungmoq lé mara byi râ matú haû su taî é a nghut. Ngamoq gi, asak duì kôle, shî kôle, nungmoq eq rahá wó dut shoq, nungmoq gi, ngamoq é i-myt unghkaû má lúng nyi é nghut lhê nghû, hí hkûn ngò taî wú bê nghut lhê.

⁴ Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byî é gyai yhang huî ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

⁵ Hkâsu mù gâ le, ngamoq gi, Makedoni mau má jé é hkûn, ngamoq é gungdu gi, zim za a myang nyi é htoq agó, hkyô hkangmó má ngamoq wuîhke jamjau hui zô é nghut lhê. Shinggan má gi, mabyoq htoq, ahkaû má gi, gyuq kyum nyi é nghut lhê.

⁶ Nghut kôlhang, nhik ngê bang lé nhik tîng é Garai Gasang gi, Tituq lé jé lé nhang é dông mai, ngamoq lé nhik tîng byi bê nghut ri.

⁷ Yhang jé lé é dông mai za a nghut, yhang lé nungmoq nhik tîng byî é hkyô dông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuî nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byî é hkyô pé lé, ngamoq lé taî kyo bê nghut ri.

⁸ Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê.

⁹ Nghut kôlhang, ngò gi, ahkuî gabú lhê; haû gi, nungmoq lé yón hui nhang é yanmai a nghut é za,

nungmoq é yón hkyo èq, nungmoq lé myit lhing nhang é yanmai ru nghut lhê. Nungmoq gi, Garai Gasang ô nau é dông yón huí é bang dut bekô nghut mù, nungmoq lé, ngamoq èq hai akyû le a lhoq yôm byî é nghut lhê.

¹⁰ Hkâsu mù gâ le, Garai o é dông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lhing nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri.

¹¹ Garai o é dông, nungmoq chyáng akyû lhoq htoq byî é yón kuq hkyô lé wú wú keq! Haú gi, gyai yhang myit zuq é hkyô, yhumsing gùng mara a bo é lé tân shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byî é hkyô, tengmán hkyô kut râ rì rì nghut é hkyô pé nghut lhê. Nungmoq gi, haú hkyô má mara a bo é lé hkat hkangmó má saksé tân shit bekô nghut ri.

¹² Haú mù luí, ngò, nungmoq lé kê kat é nghut kôlhang, kut shut su é yanmai le a nghut, kut shut é huí zo su é yanmai le a nghut é za, ngamoq lé nungmoq hkâ-í ap nóng byî é hkyô lé, Garai Gasâng hí má nungmoq gùng nungmoq wó myâng râ matú kê kat é sheq ru nghut lhê.

¹³ Haú pé banshoq dông mai, ngamoq gi, myit wum byî é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gâ lé, nungmoq banshoq bâng èq yhâng é myit lé lhoq nguingón byi kê é yanmai nghut ri.

¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taí é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê.

¹⁵ Nungmoq banshoq bang jìno gyo kômù, gyuq nán é myit mai yhang lé lhom hap yù kô é lé, yhang myitbùn é hkún, yhang nungmoq lé chyitdap é myit gi, je riyhang kô dik nyi ri.

¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byî É Hkyô

¹ Gumang wuì ê, ahkuî, ngamoq gi, Makedoni mau mâ é noqkuq hpûng pé lé Garai Gasang byî é jeju eq sêng é hkyô, nungmoq lé sé nhâng nau ri.

² Yhangmoq gi, wuîhke jamjau hkyô myo myô èq chyam lik é huì é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri.

³ Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lhang byi kô é hkyô lé, ngò saksé hkám lhê. Yhangmoq gi, yhangmoq é myit hkaû mai yhang haû su kut kô é nghut ri.

⁴ Yhangmoq gi, haû sân-yúng bang lé wó bo dojaú rá matú, ngamoq lé gyai yhang ahkáng dung kô é nghut ri.

⁵ Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng

é dông, yhangmoq gùng lé hí haû Yhumsîng lé ap byî pyám kômù, hau htâng sheq ngamoq lé ap kô é nghut ri.

⁶ Haû mù luî, Tituq yhang hí kut hi nyì bê nghut é yanmai, ngamoq gi, jeju haû lé nungmoq chyáng le shuí lhoq byíng jup byi râ matú, yhang lé wum byi bê nghut lê.

⁷ Nungmoq gi, lumjîng myit má, dang nyo é hkyô má le, sumsé hpaqchyî hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkgangmó má agùn agó dut bekô eq rajung za, nungmoq gi, byí nau é jeju shî má le agùn agó dut râ lé, bûn nyì keq.

⁸ Ngò gi, nungmoq lé hkunmó hkyô é a nghut, nghut kôlháng, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú naû luî sheq ru nghut lê.

⁹ Hkâsu mù gâ le, nungmoq gi, nga-nhûng é Yhumsîng Yesuq Hkrisduq é jeju lé sê akô nghut ri. Yhang gi, Yhâng é myùng hkyô dông mai nungmoq wó bang dut kó sháng gaq ga, jung hkgangmó wó sũ nghut kôlháng, nungmoq é matú é yanmai, myùng sũ dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyî byi kôlé: A-nhik, nungmoq gi, sâng-hi, byî hí kô é za a nghut, haû su kut nau é myit bo é bang le nghut akô.

¹¹ Nungmoq wó dut é eq rajung za, haû lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuî, muzó haû lhoq pán keq.

¹² Hkâsu mù gâ le, byí nau é myit bo é nghut jáng,

chyunghuq haû gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wòlai dut, góbang gi, hkyamsâ nyì râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê.

¹⁴ Nungmoq haî râ tô é lé, yhangmoq agùn agó wó é mâ é wó dum taû htuqbang byi kó sháng gaq, ahkui lhê é ahkyíng má, yhangmoq haî râ tô é lé, nungmoq agùn agó wó é mâ é htuqbang byi keq. Haû jáng sheq, wuí wuí za wó dut kó râ nghut lhê.

¹⁵ Haû gi, "Myo myo tsíng yu é sù gi, lúm myo shoq wó é a nghut, shau za tsíng yu é sù gi, lúm shau shoq wó é a nghut."✧ ga kê tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byî é eq rajung zâ é myit lé, Tituq é i-myit má kat byî é Garai Gasang lé, ngò jeju hkya-ôn lhê.

¹⁷ Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhânggùng yhang myit hpyit yû luí, nungmoq chyáng lé lô gù za nghut ri.

¹⁸ Ngamoq gi, haû gabú danglù lé dojaú é má no- qkuq hpûng pé banshoq èq hkya-on huí é gumang hpó haû lé le, yhang eq rahá nhang kat lhê.

¹⁹ Hau htoq agó, ngamoq garúm râ myit bo nyi é hkyô lé tân shit mù, haû Yhumsíng lé hkungga râ matú ngamoq wú gôn nyi hkyô nghut é, alu lé ngamoq yu chung é hkûn, ngamoq é byinzùm

✧ 8:15 Htoq Ló 16:18

kut râ matú, noqkuq hpûng pê èq hkyin yu é sù le yhang nghut lhê.

²⁰ Ngamoq gi, myit lòm luî byî é chyunghuq shí lé ngamoq wú gôn nyi é hkyô má, ó yuq èq le mara hô râ hkyô a htoq shoq sidiq nyi lhê.

²¹ Hkâsu mù gâ le, jô é hkyô kut râ matú ngamoq shikut nyi é gi, haû Yhumsing é myoq hí má za a nghut, byu pê é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotû gumang hpó lé le yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tô é yanmai, shirông myit je riyhang bo nyi ri.

²³ Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhông é gumâng nhik é hkyô ga jáng, yhangnhik gi, noqkuq hpûng pê é gunglik eq Hkrisduq é aróng nghut akô.

²⁴ Haû mù luî, haû noqkuq hpûng pé wó myâng kó sháng gaq, nungmoq má ngamoq haî mù gumrong é hkyô eq nungmoq é chyitdap myit é saksé lé, haû bang lé tân shit keq.

9

¹ Ngò gi, haû sân-yúng bang lé htuqbang râ hkyô eq séng luî, nungmoq lé kê kat râ a ra nghut ri.

² Hkâsu mù gâ le, nungmoq gyai garúm nau é myit lé ngò sê lhê, haû mù, ngò gi, Makedoni mau bang lé, haû hkyô eq séng luî gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taî kyô é nghut lhê. Nungmoq é gyai yhang myit toq é hkyô gi,

yhangmoq myo hpyang lé, htuqbang nau é myit nhaû toq byi bê nghut ri.

³ Nghut kôlhang, shí hkyô má nungmoq eq séng luî ngamoq gumrong é gi, hká dông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wuì lé nhang kat é nghut lhê.

⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a nghut, ngamoq le, nungmoq lé lûm yhang lum pyâm é yanmai, hoq bo hpu râ nghut lhê.

⁵ Haû mù luî, nungmoq danggidiq byî to bê nghut é, chyunghuq lé rago wó lajâng pân to râ matú, gumang wuì lé wum taí tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haû hkûn sheq, a nau é dông byî é a nghut é za, byî nau é chyunghuq dông hen tô é dut râ nghut lhê.

Agùn Agó Byî É Hkyô

⁶ Shau za sân hkyó sù gi, shau za shû yù râ nghut mù, agùn agó sân hkyó sù gi, agùn agó shû yù râ nghut lhê gâ é dang lé, myitbûn nyi keq.

⁷ Yuq hkangmó gi, a kâm byî é eq byí nhang é dông a nghut é za, yhumsing myit má byí nau é myhó lé myit hpyit yû mù byî é dông dut râ lhê. Hkâsu mù gâ le, Garai Gasang gi, gabú myit eq byi sù lé chyitdap ri.

⁸ Haû mù, ahkyíng hkangmó jung hkangmó má, nungmoq râ é banshoq wó mù, ge é muzó hkangmó lé nungmoq je myo wó kut kó sháng gaq

ga, Garai Gasang gi, jeju lhunglhang lé, nungmoq lé wó byí é sù nghut lhê.

⁹ Haú gi,

"Yhang gi, a ha bûn é za myùng bang lé yhang é chyunghuq tsing gam byi bê nghut ri; Yhang é dingmán hkyô gi, ahtum abyuq gîng nyi ri."✧

ga kê to eq rajung za nghut ri.

¹⁰ Kyô hkyô sù lé kyôshi, zoshuq matú muk byí é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyô é ashi lé myô lò nhâng râ nghut lhê.

¹¹ Nungmoq gi, ayoq abun hkanmó má agùn agó byí é bang wó dut kó râ matú, hkyô hkanmó má sùt wó é bang dut é hui kó râ nghut lhê. Nungmoq agùn agó byí é hkyô lé, ngamoq hai byi mù, Garai Gasang lé jeju hkya-ôn é hkyô dut râ nghut lhê.

¹² Nungmoq dojaú é hkyô shî gi, Garai Gasang é byu pé râ é hkyô lé lajang byí é za a nghut, Garai Gasang lé jeju bûn é dang byíng mui nyi nhang é le nghut lhê.

¹³ Dojaú hkyô hau é yanmai, nungmoq lhumzui hkyô saksé tân shit bekô nghut mù, byu pé gi, Hkrisduq é gabú danglù lé nungmoq yín yû lûi jîno gyo kê é yanmai le, yhangmoq eq yuq hkanmó lé, nungmoq é a ha bûn é myit mai shuî gam chûng kê é yanmai le, Garai Gasang lé hkya-on kó râ nghut lhê.

¹⁴ Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyûdung byí é u má, yhangmoq é myit

✧ 9:9 Hkya-on 112:9

nhiklhum gi, nungmoq chyáng htoq jé râ nghut lhê.

¹⁵ A ung htoq taí é Garai Gasâng é chyunghuq é yanmai, jeju hkya-on hkyô gi, Yhâng chyáng ru nghut nyí sháng gaq ô!

10

Poluq, Yhâng É Hpungmû Lé Taí Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wàm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô đông mai, nungmoq lé pying kat lhê.

² Shí mingkân é nyì yap a-tsang đông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dâ tô lhê. Ngò jé lé é hkûn, nungmoq lé haû sù é myit a shit ra sháng gaq, ngò nungmoq lé dúng tôngbán kat lhê.

³ Hkâsu mù gâ le, ngamoq gi, mingkan shí má asak dui nyì kôlhang mingkan byu pé kut é đông majan zân é a nghut.

⁴ Ngamoq majan zân é laknak gi, mingkan shi é laknak a nghut é za, shut shai é đông dang-rháng hkyô nghut é, gíngtíng é gyedap pé lé lhoq htên pyám râ matú Garaí é a-tsam byíng é laknak ru nghut lhê.

⁵ Ngamoq gi, dang-rháng rhâng lhûm é hkyô pé eq Garai Gasang lé sê é hkyô lé shut shai shoq yhumsing gùng yhumsing lhoq myhang mhaû é hkyô hkgangmó lé lhoq htên pyám mù, Hkrisduq é jìno gyo râ matú, myit sôn é hkyô hkat hkgangmó lé shúm kut yu é nghut lhê.

⁶ Nungmoq é jìno gyo hkyô gi, gumjup é hkûn, jìno a gyô é hkyô hkangmó lé ngamoq dam byi râ rì rì dut râ nghut lhê.

⁷ Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq.

⁸ Hkâsu mù gâ le, nungmoq lé lêng hkyó râ nó gi, nungmoq lé kô myhâng nhâng râ matú, ngamoq lé haû Yhumsîng byî é ahko ahkáng lé gyai gumrong le lháng, ngò gi, hoq hpû é hui râ a nghut.

⁹ Ngò gi, ngá é laiká pê èq nungmoq lé kyuq é su a dut nhâng nau é nghut lhê.

¹⁰ Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhang, yhânggùng gi, byuwup a bo é nghut mù, yhang tai é dang pé gi, haî a nghut." ga tai akô.

¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui sai râ nghut é hkyô lé, haû sù é bang sê gyo râ dut lhê.

¹² Ngamoq gi, haû yhumsing gùng yhumsîng owaq é bâng é hpúng má bo lom é hkyô nghut nghut, yhangmoq eq whuî é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chin lhum wú é eq yhangmoq gùng yhangmoq whuî lhum wú kô é hkûn, hpaqchyî a bo é bang dut bekô nghut ri.

¹³ Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byî é, nungmoq chyáng lháng hkyit jé

shoq nghut é maukyo hkaû má za gumrông râ nghut lhê.

¹⁴ Ngamoq gi, nungmoq chyáng a jé lé wú é dông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chung mù, nungmoq chyáng lháng lé jé bê nghut lhê.

¹⁵ Dum, ngamoq gi, góbang kut é muzó lé le, âng é mai lai luí gumrong hai é a nghut. Ngamoq myoqbyu é hkyô gi, nungmoq é lumjîng myit kô myhang jat nyi jáng sheq, nungmoq chyáng ngamoq zui saî é jowò gyai wó lhoq lâm râ nghut lhê.

¹⁶ Haû gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saî to bê loqzó eq séng luí, gumrông nau é a nghut.

¹⁷ Nghut kôlhang, "Gumrong é sù gi, haû Yhumsîng má gumrông sháng gaq."✧ ga kê tô ri.

¹⁸ Hkâsu mù gâ le, yhumsîng gùng yhumsîng owaq é sù gi, hap yù huí é a nghut é za, haû Yhumsîng èq owaq byî é sù sheq, hap yù huí é ru nghut lhê.

11

Lagyo Apyoq Pé Eq Poluq

¹ Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haû su kut nyi gù nghut bekô.

² Haî mù gâ le, ngò gi, Garai Gasang mai nungmoq lé magum é myit èq, nungmoq é matú magûm byi lhê. Ngò gi, nungmoq lé, sân-yúng é zomyi

✧ 10:17 Yer 9:24

gyíng lé su, Hkrisduq chyáng wó shit sháng gaq nghû, Hkrisduq nghut é yhumsîng hpô chyáng za nungmoq lé byî zo râ nghû, danggidiq byî to bê nghut lâ.

³ Nghut kôlhang, Ewaq gi, lhangmuì hpaqchyî dâ é eq mhaú zô é huì é su, nungmoq myit é hkyô pé gi, Hkrisduq chyáng nungmoq é lhumzuì é eq sansêng é i-myit ap nóng é hkyô mai shuì nghoq ló byuq é hui râ lé, ngò myit chiq ri.

⁴ Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haú lé lui lui za lhom hap yu é dut bekô nghut ri.

⁵ Nghut kôlhang, ngò gi, "Ahkyak-lagyô pé" ga bâng é htoq má ratsuí lhang gyamgyì gyô sù a nghut nghû myit ngam é nghut lâ.

⁶ Ngò gi, dang taí hpaqchyî kung sù rayuq a nghut kôlhang, sumsé hpaqchyî bò sù nghut lâ. Ngamoq gi, hkyô hkanmó má, nungmoq lé haú hkyô hkyâng shoq sé nhâng bê nghut lâ.

⁷ Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lú?

⁸ Ngò, nungmoq lé dojaú râ matú, gotû noqkuq hpûng pé mai htuqbâng é lé hap yu é gi, haú bâng chyáng mai ngò zik lú yu é đông dut bê nghut lâ.

⁹ Ngò gi, nungmoq eq rahá nyì mù, rajung jung

râ é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wuì gi, ngò hai râ é lé htuqbang byi kô é yanmai nghut lhê. Hká đông nghut kôlhang, ngò gi, ngá gûng lé, nungmoq é matú wòlai a dut nhâng shoq kut bê nghut mù, xoq luì le haù đông kut nyi râ nghut lhê.

¹⁰ Haù Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lhang, ngò haù su gumrong é hkyô lé wó hkûm zìng râ a nghut.

¹¹ Haì mù l hú? Ngò, nungmoq lé a chytidap é yanmai nghut lhê l hú? Ngò, nungmoq lé chytidap é hkyô lé, Garai Gasang sê lhê.

¹² Ngò gi, yhangmoq zui saì é lé gumrong é hkyô pé má ngamoq eq rawuì za sòn byi râ ahko ahkáng ô nau é bang lé ahkáng a byi râ matú, ngò kut nyi é su xoq luì kut shi râ nghut lhê.

¹³ Hkâsu mù gâ le, haù sù é bang gi, lagyo apyoq pé, mhaù zô é mù zui bang, Hkrisduq é lagyo pé đông kut mhaù é bang nghut akô.

¹⁴ Haù gi, maù ra hkyô a joq, hkâsu mù gâ le, Tsadán lhang gi, maubó é maumang lagyo rayuq đông kut mhaù é sù nghut lhê.

¹⁵ Haù mù, Tsadán é dui-nhâng zoshâng wuì gi, dingmán hkyô é dui-nhâng zoshâng wuì đông kut mhaù é nghut jáng, maù dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

Yhâng É Wuìhke Jamjau Hkyô Eq Séng Luì, Poluq Gumrong É Hkyô

¹⁶ Ngò puq taí kôlé, ó yuq le, ngo lé byù gò dông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq.

¹⁷ Ngò, haû su gumrong é hkyô gi, haû Yhumsîng o é dông ngò taí nyi é a nghut, byù gò rayuq dông taí nyi é ru nghut lhê.

¹⁸ Byù myo myo gi, mingkân é hkyô dông gumrong nyi bum lhê nghut mù, ngò le gumrông râ nghut lhê.

¹⁹ Nungmoq gi, hpaqchyî lûm bo kô é nghut mù, byù go pé lé gabú myit èq jân nyi akô nhung!

²⁰ Gè gè yhang, nungmoq gi, nungmoq lé jùn kut é sù lé le, nungmoq lé rhoí zô é sù lé le, nungmoq chyáng akyû hô zô yu é sù lé le, yhang gûng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri.

²¹ Ngamoq gi, nungmoq lé haú hkyô kut râ má wum gyai nyhôm lhê nghû yín yû râ lé, ngò, hoq ri!

Rayuq yuq, haí lé wám gumrong é nghut jáng, ngò le, haû lé wám gumrong lhê nghû, byù gò rayuq dông ngò taí nyi é nghut lhê.

²² Yhangmoq gi, Hebre byu pé nghut akô lúhú? Ngò le nghut lhê. Yhangmoq gi, Israelaq byu pé nghut akô lúhú? Ngò le nghut lhê. Yhangmoq gi, Abraham é awut ashîn pé nghut akô lúhú? Ngò le nghut lhê.

²³ Yhangmoq gi, Hkrisduq é dui-nhâng zoshâng wuì nghut akô lúhú? (Ngò gi, myit a gyîng é sù dông haû su taí é nghut lhê.) Ngò gi, je nghut lhê. Ngò gi, mô zui je shikut bê, htóng anum num je lúng wú bê,

je riyhang bat é huí wú bê, shî râ î é adàm dàm huí wú bê nghut lhê.

²⁴ Ngò gi, Yudaq byu pé nuichum èq bat é myi xê dàm byíng râ radàm ra ra dut é, ngo lhíng hui zô wú é nghut lhê.

²⁵ Ngò gi, dumbáng èq nhuq huí é sum dàm, shî sháng gaq ga luqgok èq dú huí é radàm, wui-sanghpo byoq huí é sum dàm, wuimau má myû byôm é ra-nyí ra-myìn hui zô wú bê nghut lhê.

²⁶ Ngò gi, xoq xoq hkyowuì htoq e ló é hkûn, wui gû é gyuq chiq jung, damyaq huí é gyuq chiq jung, ngá é amyû wui chyáng mâ é gyuq chiq jung, tûngbau pè chyáng mâ é gyuq chiq jung, myuq hkaû pé mâ é gyuq chiq jung, yoso pé mâ é gyuq chiq jung, wuimau mâ é gyuq chiq jung eq gumang apyoq pè chyáng mâ é gyuq chiq jung pé hui zô wú bê nghut lhê.

²⁷ Ngò gi, mù lé zuí ngú zuí hkyik mù, anum num a myang yhup shoq dut wú bê nghut lhê. Ngò gi, zòmut wui shit huí é eq zoshuq a wó é anum num huí laí lo wú bê nghut lhê. Ngò gi, gyoq hpû é eq gùngchîn dut é huí wú bê nghut lhê.

²⁸ Haú pé lhunglhâng htoq má, noqkuq hpûng pé banshoq é matú ngò myit chiq byí é hkyô gi, nyí wui ngò má wòlai dut nyi ri.

²⁹ Rayuq yuq wum nyhóm le, ngò le wum a nyhóm râ lhú? Rayuq yuq mara shuí kut shut é hui le, ngò myit a nyé râ lhú?

³⁰ Ngò gumrông râ dut é nghut le gi, ngò wum nyhôm é hkyô lé tân shit é pé lé gumrông râ nghut lhê.

³¹ Ngò a mhaû nyi é hkyô lé pyat dedu hkya-

on huí é sù, haù Yhumsîng Yesuq é Îwa eq Garai Gasang sê lhê.

³² Damaskuq myuq má, Hkohlâm Areta é a-ô mâ é mauzau gi, ngo lé chyup râ matú, myuq lé zúng nhang é nghut lhê.

³³ Nghut kôlhang, ngò gi, manghkoq má lúng mù, myuq xêwâm mâ é hkohot dong mai lhoq hkyô kat é hui luí, yhâng é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rù gumrông nyi râ za nghut lhê. Akyû wó râ a nghut kôlhang, haù Yhumsîng chyáng mai lo é myoqwup shing-rán pé eq hpông shit é shing-rán pé lé gumrông râ nghut lhê.

² Ngò gi, lai lò bê raxe myi zân hkûn, mauhkûng sum tsáng nghu é má shuí toq yu huí é, Hkrisduq mâ é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê.

³ Yhang hparadisú má shuí toq yû huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê.

⁴ Yhang gi, byu pé tai kyô htoq râ ahkáng a wó é hkyô pé nghut é, a wó tai sân kyô é hkyô pé lé wó gyô ri.

⁵ Ngò gi, haù yuq sù é byu é hkyô eq séng lui gumrông râ nghut lhê; nghut kôlhang, ngò gi, ngá

* **12:2** *Hkrisduq mâ é byù rayuq gá é gi, Poluq yhânggùng yhang lé tai nyi é nghut lhê.*

é wum nyhóm hkyô eq séng luí, gumrong é mai lai luí, ngá gûng ngò gumrông râ a nghut.

⁶ Ngò gi, gumrông hkyô lé hkyin yù râ dut é nghut jáng lhang, byù gò dut râ a nghut, haì mù gâ le, ngò gi, tengmán hkyô taì nyì râ nghut lhê. Nghut kôhang, ó yuq le, ngò kut é eq ngò taì é mai myit lum to kô é htoq má, ngo lé, je a myit lo ko sháng gaq nghû, ngò a gumrông kut pyâm nyi lhê.

⁷ Haù laklaí dik é dông ngo lé hpông shit é shing-rán mó pê é yanmai, ngò a nghutbùn byuq sháng gaq ga, ngo lé gunjang râ matú, Tsadán é lagyo nghut é zu lé, ngá é gungsho má kat byì to bê nghut ri.

⁸ Haù lé ngá chyáng mai yu pyám byi râ matú, ngò, Yhumsing lé sum dâm dúng tôngbán wú bê nghut lhê.

⁹ Nghut kôhang, Yhang gi, "Ngá é jeju gi, náng é matú luq dun é nghut lhê; hkâsu mù gâ le, Ngá é a-tsam gi, wum nyhôm é hkyô má lhoq gumjup é hui ri." ga luí, ngo lé taì ri. Haù mù luí, Hkrisduq é a-tsam gi, ngò má wó joq nyì sháng gaq nghû, ngò gi, ngá é wum nyhôm é hkyô pé eq séng luí, gabú myit mai je riyhang gumrông râ nghut lhê.

¹⁰ Haù nghut mù luí, ngò gi, Hkrisduq é yanmai, wum nyhôm é hkyô pé má le, rhoì huí é hkyô pé má le, wuìhke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhôm é hkûn sheq, ngò wúm bo é nghut lhê.

Poluq Chiq Byì É Hkyô

¹¹ Ngò gi, ngá gûng ngò byù gò lhoq kut yù bê nghut ri, nghut kôhang, haù gi, nungmoq kut

nhang é nghut lhê. Ngò gi, nungmoq èq owaq é hui ang sù nghut lhê; hkâsu mù gà le, ngò gi, haí a nghut kôlhang, "Ahkyak lagyô pé" ga bâng é htoq má ratsuí lháng gyamgyì gyó sù a nghut.

¹² Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nungmoq chyáng kut bê nghut lhê.

¹³ Ngò gi, nungmoq é matú, hkâ-nhám le wòlai a dut é nhing, nungmoq gi, hkâsu mù, gotú noqkuq hpûng pé htoq má gyamgyì gyó nyi akô lhú? Ngò, háu hkyô má shut é nghut jáng, mara hkyut pyám byi kó laq!

¹⁴ Ahkuí, ngò gi, nungmoq lé, sum lhing nghû râ dàm, lé kum râ rì rì nghut bê mù, nungmoq é matú wòlai gi, a dut râ nghut lhê. Haí mù gà le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká đông nghut kôle, zo wuí gi, mó wui é matú sutzè hkong to byi râ dut é a nghut, mó wuí sheq, zô wuí é matú hkong to byi râ dut é nghut lhê.

¹⁵ Haú mù luí, ngò gi, gyai yhang gabú é myit mai, ngò wó é jung hkangmó lé nungmoq é matú chung jài râ nghut mù, ngá gûng lé lháng chûng jài râ nghut lhê. Ngò, nungmoq lé myô chyitdap é yanmai, nungmoq gi, ngo lé shaú chyitdap kó râ lhú?

¹⁶ Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyí haq da sù dut mù, mhaú lhik é đông nungmoq lé chyup yú sù dut byuq bê ga nungmoq ra-am myit akô myihung!

¹⁷ Ngò gi, nungmoq chyáng nhang kat byí é byù

dông, nungmoq chyáng amyat kut zô yù bê nghut lhê lúhú?

¹⁸ Ngò gi, Tituq lé nungmoq chyáng lé râ matú wum taí tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lúhú? Nga-nhik gi, rajung zâ é myit dông chyat kut mù, rajung zâ é hkyô lé chyat châng é su nhik nghut lhê, a nghut kó lúhú?

¹⁹ Ngamoq gi, nungmoq hí má ngamoq gùng ngamoq taí hung yu nyi rì nghû, ahkuî jé shoq myit nyi akô lúhú? Ngamoq gi, Hkrisduq mâ é byu pé dông, Garai Gasâng hí má taí nyi é nghut lhê. Chyitdap é gumang wuì ê, ngamoq kut é jung hkgangmó gi, nungmoq é akyu matú chyat nghut lhê.

²⁰ Hkâsu mù gâ le, ngo lé jé é hkûn, ngò, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngò a wó dut râ lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbûn é eq atau ahû dut é hkyô pé joq râ lé gyuq ri.

²¹ Ngò dum lé jé é hkûn, ngá é Garai Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut é dông nyi zô lúhûm nau é i-myit, gungsho zùm yap é yubak mara eq a sân-yúng é hkyô kut shut é mai myit a lêng bang myo myô é yanmai, yón kuq é hui zo râ lé, ngò myit chiq ri.

13

Ló Htáng Má Sidiq Byî É Dang Pé

¹ Ahkuî, ngò, nungmoq chyáng lé kum râ gi, sum lîng nghû râ dàm nghut lhê. Haû gi, "Mara hun é hkyô hkangmó lé, í yuq sum yuq saksé hkâm é èq lhoq teng ra râ nghut lhê."✧ ga kê tô é eq rajung za nghut lhê.

² Ngò gi, í lîng nghû râ dàm nungmoq eq rahá nyi é hkûn, nungmoq lé sidiq byi gû bê nghut lhê. Ahkuî le, nungmoq eq wê gâng tô é u lé, dum taí kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê.

³ Haû gi, ngò dông mai Hkrisduq dang taí nyi é hkyô saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuî-û é hkyô má wum nyhôm é a nghut, nungmoq chyáng a-tsam mó shit sủ sheq ru nghut ri.

⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm èq dui nyi é gi, hkyak têng lhê. Haû eq rajung za, ngamoq gi, Yhang su wum nyhôm kôlhang, nungmoq lé dojaú râ matú, Garai Gasâng é a-tsâm èq, Yhang eq rahá dui nyi râ nghut lhê.

⁵ Nungmoq gi, lumjínq hkyô má nghut nyi lhê luq, yhumsing gùng yhumsínq myî wú keq. Yhum-sing gùng yhumsínq chyam wú keq. Nungmoq gi, chyam é má sủm byuq é za a nghut jáng, nungmoq chyáng Hkrisduq Yesuq lúng nyi bê hkyô lé sé kó râ nghut lhê.

⁶ Ngamoq gi, chyam é má a sủm é hkyô lé, nungmoq wó sé kó râ nghut lhê nghû, ngò hkyak lum tô lhê.

✧ 13:1 Tarâ Pun 19:15

⁷ Ahkuî, ngamoq gi, nungmoq shut é hkyô haî a kut kó râ matú, Garai Gasâng chyáng kyûdung byi lhê. Haû gi, ngamoq chyâm hui luî wó lut é hkyô lé byu pé myàng kó râ matú a nghut é za, ngamoq sôm é su dut kôlhang, nungmoq ge é hkyô kut kó râ lé myàng râ matú nghut lhê.

⁸ Hkâsu mù gâ le, ngamoq gi, haû tengmán hkyô eq shaî é dông haî le a ge kut é za, tengmán hkyo é matú za kut râ dut é nghut lhê.

⁹ Ngamoq wum nyhóm kôlhang, nungmoq wúm bo é hkûn, ngamoq gabú é nghut lhê; ngamoq kyûdung é gi, nungmoq gumjup râ matú nghut lhê.

¹⁰ Ngò gi, wê gâng tô é hkûn, haû hkyô pé lé haî mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsîng ngo lé byî é sheq ru nghut lhê.

Ló Htâng É Shi-kyám Dang

¹¹ Ló htáng má ngò taí nau é gi, gumang wui ê, nguingón yuqyo nyi keq. Gumjup hkyô shut sô nyi keq, ngò dúng tôngbán é dang lé gyo keq, myit rahkat za dut nyi keq, nguingón shoq asak duì nyi keq. Haû hkûn, chyitdap hkyô eq nguingón hkyo é Garai Gasang gi, nungmoq eq rahá nyi nyi râ nghut lhê.

¹² Chyoiyúng é bopuq puq é èq, rayuq eq rayuq shi-kyâm lhum keq.

¹³ Sân-yúng bang banshoq gi, nungmoq lé shi-kyâm kat akô.

¹⁴ Haû Yhumsîng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é

zùm yap hkyô gi, nungmoq banshoq bâng chyáng
ru joq nyî sháng gaq ô.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

23f9fc55-a8a4-59ef-9513-707ec336b0ee